

Kertas jemaah menteri siap

■ Pelaksanaan inisiatif subsidi secara bersasar tertakluk kepada keputusan mesyuarat

Idris Musa
am@hmetro.com.my

Kuala Lumpur

Pelaksanaan inisiatif subsidi secara bersasar tertakluk kepada keputusan yang dicapai dalam mesyuarat jemaah menteri dalam masa terdekat.

Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail berkata, pihaknya sudah menyiapkan kertas jemaah menteri mengenai perkara itu.

"Sekarang (kertas itu) telah siap dan saya cuma tunggu masa untuk membentangkan kepada mesyuarat jemaah menteri dan tertakluk kepada apa-apa keputusan dan apa-apa pindaan.

"Saya tidak boleh mendahului jemaah menteri, kerana ini adalah polisi baharu. Kita belum pernah melaksanakannya, sudah tentu anggota jemaah menteri mungkin ada pandangan yang mesti saya hormati.

"Tapi di peringkat Kementerian, kami sudah selesai menghasilkan satu

kertas jemaah menteri yang mengambil kira semua aspek yang kami anggap munasabah. Ia menunggu masa untuk saya bentangkan saja," katanya.

Beliau berkata demikian selepas merasmikan penutupan Karnival Jualan Inisiatif Kedai Ekonomi Pengguna (*i-Keep*) di Padang Perustakaan Awam, Pantai Dalam di sini, semalam.

Hadir sama, Timbalannya Chong Chieng Jen dan Ahli Parlimen Lembah Pantai Fahmi Fadzil.

Pada majlis itu, beliau turut melancarkan minyak masak jenama baharu, Lestari yang dijual pada harga RM16.50 bagi lima kilogram.

Karnival empat hari bermula Jumaat lalu itu antara lain bertujuan memperkenalkan inisiatif baharu berkenaan sebagai penjenamaan semula terhadap Kedai Rakyat 1Malaysia (KRIM) yang dihentikan.

Mengulas mengenai *i-Keep*, Saifuddin berkata, ketika ini ada 368 buah kedai *i-Keep* membabitkan 10 rakan kongsi peruncit dan

menjelang 2020 disasarkan sejumlah 500 buah kedai di seluruh negara.

"Ciri yang kena ada pada kedai ini ialah ia mesti menjual produk utama pengguna pada harga rendah yang membawa sekurang-kurangnya 30 peratus penjimatan terhadap barangan keperluan utama pengguna," katanya.

Berkenaan isu harga ubat, beliau berkata, pihaknya sudah mengadakan perbincangan dengan Ke-

menterian Kesihatan dan ia penting kerana aspek penguatkuasaan adalah di bawah bidang kuasa kementerian.

"Dalam perbincangan kami, saya difahamkan Menteri Kesihatan (Datuk Seri Dr Dzulkefly Ahmad) dalam peringkat akhir untuk mengenal pasti mekanisme atau kaedah bagi menentukan sesuatu jenis harga ubat di negara kita," katanya.

Menjawab isu gesaan memboikot barangan bukan Bumiputera oleh sege-lintir pihak, beliau berkata, boikot bukan jalan sewajarnya.

FAKTA
Kini terdapat
368 kedai
i-Keep



FOTO: KHAIRUL AZHAR AHMAD

SAIFUDDIN (dua dari kanan) merasmikan penutupan Karnival Jalan i-KeeP di Padang Perpustakaan Awam, semalam. Turut hadir, **Chong** (dua dari kiri) dan **Fahmi** (kanan).